

## **CAPE, Lu Sorcî d'Hèrbeumont.**

**Gaston Lucy - - Presse-Annonces -7 Décembre 1973**

Lu Dansô, in bwès d'Hèrbeumont, astot ossi in r'fûje du leus-warous, ki sont don, coume on l'sét bin, des supôts d' Satan. Les vîs les counichint coume « lycanthropes » (in mot grec = oume-leu) et pou lès Romins, c'ère des « Versipellis ».

Ils avint évolué à dulon d'l'histwâre. Si, dins l'Antikité, les leus-warous lu duvnint pou in timps k'astot dit, dins nôs payis, et à des èpokes pus près d'nous ôtes, is n'astint leus-warous ku d'nute. Tins du djoû, i r'purdint leu forme d'oume et on n'plot les r'couniche k' à leûs sourçis, ki s'rudjondint d'ène ouye à l'ôte. Si on z'arivot à grèyî leu pê d'leu, c'ère fini pour zès; leu pouvwâr finichot.

In côp, don, ène fame du Morte han, k'avot sté à S'dan pwârter la lin.ne du ses bèrbis, ruv'not toute seûle tins d' par'nute. A traviêasant l' Dansô, vlà-t-i nin k'ile wèt flamer in feu. Ile s'avance pou s'rutchâfer in pô (i c'minçot d'jà à djaloter), cand ile wèt dlé l'feu ène oume couchî à l'tère avu kate leus.

Ile è volu fwêre dumi-toûr, mès l'oume l'avot vu et i l'è soumé v'nu dlé l'feu. C'ère èn' individu d'Hèrbeumont, lu Cape, k'on l' loumot. Il astot counu coume sorçî ; on d'jot ki plot s' tchandjî en leu-warou. Çu n'è nin ça ki sbare ène fame ki s' hazârde parnute dins les bwès ; et ile s'è avançî dlé l'feu.

L'oume lî è dit d's'assîre su iynk des leus à lî d'jant tout-bas à l'orèye:  
- Wêtèz du n'nin v'lêchî r'couniche, ca les leûs vous stran'rint du côp !

La fame è don choûté cè k' l'oume lî avot dit, et cand ile è sté r'chandîe in pô, sins fwêre du brut, ile è sêwé à pus vite. Cand ile è sté in pô pus lon, l'oume è v'nu dlé lîe, pou n'nin z'ésse atindus p'às leûs. I lî è juré sa « manus » du n' jamwês câser du c' k'ile avot vû, ni às djins, ni às biêsses, à la m'naçant d'tous les maleurs, si jamwês, il atindot dîre yâk !

Tout l'monde sét bin ku t'nu in s'crèt, çu n'est nin ène afwêre du fame, surtout cand on z' è lu rnom d'esse la gazète du viadje, la çête ki raconte tout, vrê û nin vrê.

Coume ile ére rûsée, ile è trouvé l'mo.yin du s'mète kite du s'crèt.

Lès djins avint r'marké, ku d'pwuis kékes djoûs, ile avot duvnû toute drole, k'ile rêchot vlatî à l'nute et is l'ont sî pou sawè èyusse k'ile alot. Et la fame alot drî la ç'mintûre raconter às pîres c'èst k'ile avot vû. A câzant às pîres, ile respèctot l'martchî du n'nin z'à câzer, ni à oume, ni à biêsse.

Lès ôumes ki l'avint sî ont tout choûté et l'viadje è sté vite à courant, et tout l'pays, par le fêt'.

In djoû ku l'Cape astot à l' fwâre d'Arlon (à dîje eûres du marche d'Hèrbeumont), i s'trouvot dins in cafè à bwâre in vêre avu des parèys à loû. A in moumint d'né, i voûde su vêre et i s'l'ûve à d'jant: « Dju m'arvas, là la Cat'rine (sa fame) ki s'assît dlé la Roudjète pou la trêre, dju dos z'esse rintré duvant k'ile n'ûje fini ! » Et il è disparu.

Su l'moumint, ça è paru drole, mès in pô après, on z'è sû kwè.

À pîd d'ène grosse hèsse, k'on counichot coume ène place du danse pou les sorçîs, on z' è rtrouvé kékes jates sutârees à l'tère . C'ére sucrit d'sus: « Cape, rwa des sorçîs ». Iles vunint du dêrin sabbat, cand les sorçîs avint oblidjîs ynk ki passot dins l'cwin, du v'nu dansî avu zès. L'oume avot pris peû èt il avot cri.yî: Jésus, Maria ! I n'è pus rin d'mèré avå là et l'oume s'è r'trouvé su la foutche d'in tchène, 50 kilomètes pu lon.

Çu n'nère assez pou z'arèter nosse Cape et lî fwêre su procès. On z'è fwêt ène grande fiêsse cand on l'è brûlé su l'pont d'Bouyon.

Gaston LUCY

---

Scrit an fraçès p'ou Gaston. Rumètu an walon pa Louwis Bêdjot lu 23 Julièt 1996.

